

**Nunami tamarmiusumi sooq illuliortaatsip politikeqarfiginissaanut pisariaqartitsineq pillugu apeqquteqaat aallaavigalugu oqallinnissamik siunnersuut.**

(Inatsisartunut ilaasortaq Najaaraq Møller, Siumut)

**Saqqummiussissut**

(Ineqarnermut Attaveqaasersuutinullu Naalakkersuisoq)

**Siullermeerneqarnera**

Naalakkersuisut sinnerlugit Inatsisartunut ilaasortaq Najaaraq Møller nunatsinni illuliortaatsinut politikimik pisariaqartitsineq pillugu apeqquteqaat tunngavigalugu oqallinnissamut siunnersuuteqarneranut qutsavigaara.

Naalakkersuisunit sorpassuartigut siunnersuuteqartup oqallisissiamik saqqummiussinermi tunngavigisai isumaqatigaagut. Avatangiisini sanaartukkat inuunitsinni sinaakutissatut atugaraagut, aammalu inuit ataasiakkaat inuunermi periarfissaannut pingaaruteqarput. Taamaattumik illuliortaatsit inooqatigiinnermi ataatsimoorfiit annertusarneqarnissaannut aammalu kulturikkut kinaassutsit pigiinnarneqarnissaannut qitiusumik inissisimapput.

Taamaattumik nunatsinni illuliortaatsimut politikimik suliaqarnissaq pillugu siunnersuut soqutiginaateqarpoq.

Naalakkersuisunit Namminersorlutik Oqartussat illuliaanni sanaartugaannilu illuliortaatsit eqqumiitsuliallu salliutinneqartarnissaat pingaartinneqarpoq. Taamaattumik illuliortaatsinut eqqumiitsulianullu isumaliutit Naalakkersuisut *‘Illuliortiternermi sanaartormilu piujuartitsinissamut nuna tamakkerlugu periusissiaq’*-ni aamma *‘Namminersorlutik Oqartussat illuliortiterneranni sanaartormannilu aningaasalersuisarnermut periusissiaq’*-ni suliniutitut immikkoortutut ilaatinneqarput.

Nuna tamakkerlugu illuliortaatsinut politikki suliaasaavoq annertoq, isumalluutiniq piffissamillu immikkoortitsinissatsinnut pisariaqartitsiffiusoq. Tamanna pissutigalugu suliamik taamaattumik aallartitsisoqarsinnaalertinnagu, siunissamut ungasissumut periusissiorfiusumillu suliaasaq pilersaarusiorneqartariaqarpoq. Tassunga tunngatillugu uagut inuiaqatigiittut nuna tamakkerlugu illuliortaatsinut politikki suut angorusunnerlutigik, aammalu politikki taamaattoq sunik imaqaassanersoq pillugu tamanut annertuumik oqallitsitsinissaq iluaqutaasinnaavoq.

Illuliortaatsit ulluinnarni inuunitsinnut amerlasuutigut kalluaasuupput, tamannalu pissutigalugu kulturikkut oqaluttuarisaanermullu sinaakutissat kisimik aallaavigineqarsinnaanngillat. Illuliortaatsit sakkutut, inuiaqatigiinni unammilligassanut annertunerusumik aaqqiissutaasinnaasutut isigineqarnissaat taamatut pingaaruteqartigaaq. Taamaattumik nuna tamakkerlugu illuliortaatsinut politikkip suliarineqarnerani sullissit, inuiaqatigiit immikkoortuini assigiinngitsuneersimasinnaasut amerlasuut ilaatittariaqarpagut.

Matumani naggasiutigalugu erseqqissaatigerusuppara, nuna tamakkerlugu illuliortaatsinut politikkimik suliaqarnissaq aallartinneqassappat, sulinermi ataatsimut siunnerfeqarnerup aamma nunatsinni illuliortaatsinik ineriartortitsinissamut sinaakkusersuinerup akornanni oqimaaqatigiissitsinissaq nassaarineqassasoq, tamatumalu peqatigisaanik illuliortiternerni nutaaliornermut namminerlu aalajangiisinnaanermut periarfissaqarnissaq qulakkeerneqassasoq. Politikkip ineriartortitsinissamut piaarinaatsoorluni killiliinnginnissaa pingaaruteqarpoq.

Taamatut aallarniutaasumik oqaaseqarlunga oqallilluarnissatsinnut qilanaarpunga.